



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

----- 2021 թվականի №\_\_Ա  
ք. Երևան

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ  
ԿԱՐԳԱՎՈՐՈՂ ՀԱՆՁՆԱԺՈՂՈՎԻ 2016 ԹՎԱԿԱՆԻ ՀՈՒՆԻՍԻ 15-Ի №167Ա ՈՐՈՇՄԱՆ  
ՄԵՋ ՓՈՓՈԽՈՒԹՅՈՒՆՆԵՐ ԵՎ ԼՐԱՑՈՒՄՆԵՐ ԿԱՏԱՐԵԼՈՒ ՄԱՍԻՆ**

Հիմք ընդունելով «Նորմատիվ իրավական ակտերի մասին» օրենքի 1-ին հոդվածի 2-րդ մասը, 33-րդ և 34-րդ հոդվածները՝ Հայաստանի Հանրապետության հանրային ծառայությունները կարգավորող հանձնաժողովը **որոշում է.**

1. Հայաստանի Հանրապետության հանրային ծառայությունները կարգավորող հանձնաժողովի 2016 թվականի հունիսի 15-ի «Բարձրավոլտ էլեկտրացանցեր» փակ բաժնետիրական ընկերության կողմից էլեկտրական էներգիայի հաղորդման ծառայության մատուցման սակագնի հաշվարկման մեթոդիկան հաստատելու և Հայաստանի Հանրապետության հանրային ծառայությունները կարգավորող հանձնաժողովի 2005 թվականի նոյեմբերի 4-ի №158Ա որոշումն ուժը կորցրած ճանաչելու մասին» №167Ա որոշմամբ հաստատված հավելվածի՝ «Բարձրավոլտ էլեկտրացանցեր» փակ բաժնետիրական ընկերության կողմից էլեկտրական էներգիայի հաղորդման ծառայության մատուցման սակագնի հաշվարկման՝

- 1) մեթոդիկայի 2-րդ կետը շարադրել հետևյալ խմբագրությամբ.

«2. Ծառայության մատուցման սակագնի հաշվարկման հիմքում դրվում է անհրաժեշտ հասույթի ապահովման սկզբունքը, համաձայն որի՝ անհրաժեշտ հասույթը պետք է բավարարի Լիցենզավորված անձի հուսալի, անվտանգ և շարունակական գործունեության համար անհրաժեշտ ու հիմնավորված շահագործման և պահպանման ծախսերի իրականացմանը, հիմնական միջոցների մաշվածության և ոչ նյութական ակտիվների ամորտիզացիայի փոխհատուցմանը և ներգրավված

կապիտալի դիմաց թույլատրելի (ոռջամիտ) շահույթի ստացման ապահովմանը: Անհրաժեշտ հասույթը (ԱՀ) հաշվարկվում է հետևյալ բանաձևով՝

$$ԱՀ = ԳԷ + ՇՊԾ + Մ + ԹՇ + ՖԾ + ՓՎԳ - ԱԵ ,$$

որտեղ՝

**ԳԷ**-ն էլեկտրական էներգիայի հաղորդման ցանցում առաջացող անխուսափելի կորուստների և Լիցենզավորված անձի սեփական ու տնտեսական կարիքների համար էլեկտրական էներգիայի գնման ծախսն է,

**ՇՊԾ**-ն Ծառայության մատուցման համար անհրաժեշտ շահագործման և պահպանման ծախսերի մեծությունն է,

**Մ**-ն Ծառայության մատուցման համար օգտակար և օգտագործվող հիմնական միջոցների մաշվածության և ոչ նյութական ակտիվների ամորտիզացիայի արժեքն է,

**ԹՇ**-ն Ծառայության մատուցման համար օգտակար և օգտագործվող զուտ ակտիվների դիմաց թույլատրելի շահույթի մեծությունն է,

**ՖԾ**-ն Ծառայության մատուցման համար անհրաժեշտ ֆինանսական ծախսերն են,

**ՓՎԳ**-ն անհրաժեշտ հասույթում ներառված Ծառայության մատուցման հաշվարկային և փաստացի քանակների շեղման արդյունքում ձևավորված փոխհատուցման կամ վերադարձման ենթակա գումարն է, որը հաշվարկվում է 2022 թվականի փետրվարի 1-ից սկսած ժամանակահատվածների համար,

**ԱԵ**-ն այլ եկամուտն է:»,

2) մեթոդիկան լրացնել հետևյալ բովանդակությամբ 2.1 կետով.

«2.1. Էլեկտրական էներգիայի գնման ծախսը որոշվում է էլեկտրական էներգիայի հաղորդման ցանցում առաջացող անխուսափելի կորուստների, Լիցենզավորված անձի սեփական ու տնտեսական կարիքների համար ձեռքբերվող էլեկտրական էներգիայի գումարային կանխատեսվող քանակի և էլեկտրական էներգիայի մեծածախ շուկայում մատուցվող հաշվեկշռման ծառայության առավելագույն, էլեկտրաէներգետիկական համակարգի օպերատորի ծառայության, շուկայի օպերատորի ծառայության սակագների գումարային մեծության արտադրյալով, որը Ծառայության մատուցման սակագնի հետագա վերանայումների ժամանակ ճշգրտվում է փաստացի արդյունքներով: Էլեկտրական էներգիայի հաղորդման ցանցում առաջացող անխուսափելի կորուստների կանխատեսվող մեծության համար

հիմք է հանդիսանում Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով) հաստատած էլեկտրաէներգետիկական մեծածախ շուկայի առևտրային կանոնների պահանջներին համապատասխան «էլեկտրաէներգետիկական համակարգի օպերատոր» փակ բաժնետիրական ընկերության կազմած էլեկտրական էներգիայի (հզորության) արտադրության, ներկրման և արտահանման (տարանցման) կանխատեսվող հաշվեկշռով (այսուհետ՝ էլեկտրաէներգետիկական համակարգի հաշվեկշիռ) նախատեսված մեծությունը, իսկ սեփական ու տնտեսական կարիքների մասով՝ Հանձնաժողովի հետ համաձայնեցված տարեկան կանխատեսվող հաշվարկային մեծությունները:»,

3) մեթոդիկայի 3-րդ կետում «Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով)» բառերը փոխարինել «Հանձնաժողովի» բառով,

4) մեթոդիկան լրացնել հետևյալ բովանդակությամբ 10.1 կետով.

«10.1. Անհրաժեշտ հաստիքում ներառված Ծառայության մատուցման հաշվարկային և փաստացի քանակների շեղման արդյունքում ձևավորված փոխհատուցման կամ վերադարձման ենթակա գումարը (ՓՎԳ) որոշվում է հետևյալ բանաձևով՝

$$\text{ՓՎԳ} = \sum_{i=1}^m (\sigma_i^{\zeta} - \sigma_i^{\Phi}) * U_i * \left(1 + \frac{S}{100\%}\right) ,»$$

որտեղ՝

**m-ը** Հանձնաժողովի նիստին Ծառայության մատուցման սակագնի վերանայման վերաբերյալ որոշման նախագծի ներկայացման ամսվան նախորդող այն ժամանակահատվածի ամիսներն են (բացառությամբ նշված նախագծի ներկայացման ամսվան նախորդող ամսվա), որոնց համար սույն կետի համաձայն չի հաշվարկվել և Ծառայության մատուցման սակագնում չի ներառվել ՓՎԳ գումար,

**Տ<sup>ζ</sup>-ն** i-րդ ամսում մատուցվող Ծառայության հաշվարկային քանակն է,

**Տ<sup>Φ</sup>-ն** i-րդ ամսում մատուցվող Ծառայության փաստացի քանակն է,

**U<sub>i</sub>-ն** i-րդ ամսում գործող Հանձնաժողովի կողմից սահմանված Ծառայության մատուցման սակագինն է,

**S-ն** Ծառայության մատուցման հաշվարկային և փաստացի քանակների շեղման արդյունքում ձևավորված փոխհատուցման կամ վերադարձման ենթակա դրամական

միջոցների ներգրավման կամ հնարավոր ավանդադրման համար անհրաժեշտ տոկոսադրույքն է, որը որոշվում է ֆինանսական շուկայի ցուցանիշների վերլուծության արդյունքում:»,

5) մեթոդիկայի 11-րդ կետի 1-ին ենթակետն ուժը կորցրած ճանաչել,

6) մեթոդիկայի 13-րդ կետը շարադրել հետևյալ խմբագրությամբ.

«13. Ծառայության սակագինը (U) հաշվարկվում է հետևյալ բանաձևով՝

$$U = \frac{U_{\Sigma}}{W_{\Gamma} + W_{\text{բ}} + W_{\text{ոս}} + W_{\text{ա}}},$$

որտեղ՝

$W_{\Gamma}$ -ն էլեկտրական էներգիայի մատակարարման (այդ թվում՝ երաշխավորված մատակարարման) լիցենզիա ունեցող անձանց կողմից գնվող էլեկտրական էներգիայի քանակն է՝ համաձայն էլեկտրաէներգետիկական համակարգի հաշվեկշռի,

$W_{\text{բ}}$ -ն էլեկտրական էներգիայի բաշխման լիցենզիա ունեցող անձի կողմից սեփական կարիքների և բաշխման ցանցում կորուստների փոխհատուցման նպատակով գնվող էլեկտրական էներգիայի քանակն է՝ համաձայն էլեկտրաէներգետիկական համակարգի հաշվեկշռի,

$W_{\text{ոս}}$ -ն որակավորված սպառողների կողմից գնվող էլեկտրական էներգիայի քանակն է՝ համաձայն էլեկտրաէներգետիկական համակարգի հաշվեկշռի,

$W_{\text{ա}}$ -ն էլեկտրաէներգետիկական մեծածախ շուկայի մասնակիցների կողմից արտահանվող և տարանցվող էլեկտրական էներգիայի քանակն է՝ համաձայն էլեկտրաէներգետիկական համակարգի հաշվեկշռի:»:

2. Սույն որոշումն ուժի մեջ է մտնում «Բարձրավոլտ էլեկտրացանցեր» փակ բաժնետիրական ընկերությանն օրենքով սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱՀ՝**

**Գ. ԲԱՂՂԱՄՅԱՆ**

ք. Երևան  
-----2021թ.